



Takornariaqarnermik inuussutissarsiuteqarnermi akuersissutinik tunniussisarneq qanoq pitsanngortissinnaaneripput aammalu taamatut tunniussisarneq nunatsinni takornarialerisunut naapertuuttumik ingerlanneqartarnersoq pillugu apeqquteqaat aallaavigalugu oqallinnissamik siunnersuut

(Inatsisartunut ilaasortaq Aqqalu C. Jerimiassen, Atassut)

Qujanaq Inatsisartunut ilaasortamut Aqqalu C. Jerimiassen, Atassut, apeqquteqaat aallaavigalugu oqallinnissamik siunnersuummut.

Qularutigineqassanngilaq, Demokraatit isumaqarmata, nunatta takornarissanit isertitarisartagaasa annertusinissaannut piukkunnartorpassuaqartoq. Taamaattumilluuna ilaatigut, Ilulissani Nuummilu imarpik qulaallugu mittarfiit piviusunngortinnissaat ilungersuutigisimagigut. Mittarfiit maannarnissaq pisariinnerulersissavaat aammalu maanga timmisartuussinerit unammillerneqarnissaasa annertusarnissaat annertusassagunarlugu, tamannami billettinik akikinnernik kinguneqartussaammat. Takornarissanut nunallu innuttaanut nuannaarutaasumik.

Taamaattumik Demokraatinut pingaartuuvoq, takornariaqarnerup annertusinera, ilimagigatsigumi taamaassasoq, nunatta inuinit iluaqutaanissaa. Aningaasat maani nunami sulissapput takornariaqarnerullu annertusinera pitsaasumik maani nunami malugineqassaaq.

Tammajuitsussanik piniarneq assersuutissatsialaavoq, nunaqavissunut isertitatigut iluanaarutaasinnaasoq. Upperaarput, nunanit allanit takornarissat amerlanersaat nunaqavissunit angallanneqarnissarnik avataaneersunit piumanerussagaat, takornarissamut misigisaq piviusorsiortoq misigineqassammat.

Siunnersuuteqartoq Aqqalu C. Jerimiassen, Atassut isumaqarpoq, akuersissutinut inatsisip ullumikkut atuunnera ajoquteqartoq. Ilaatigut erseqqissarpaa, imaappasittoq, akuersissuteqarnissamik qinnuteqarnissamut piumasaqaatit qaffasippallaartut, maani nunaqavissut amerlasuut itigartitaasarmata.

Oqaatigisinnaanngilara tamanna ilumut ilu Moornersoq, isumaqarpungali, misissussallugu pisariaqartoq. Ajorluartumimmi imaakkajummat, innuttaasut allaffissornerujussuarmi, pisortat namminneq pilersitaanni, tammartajaartarmata. Tamanna naleqqutinngilluinnarpoq. Uatsinnut naallerarnissarput tungavissaqanngilaq. Demokraatinit uagut aallaavittut isumaqartuaannarpugut, inatsisit malittarisassallu sapinngisamik ima ajornaatsigissasut, ajornanngitsumik ingerlanneqarsinnaallutik ajornanngippallu akikitsumik. Tamannalu aamma atuulluinnarpoq takornariaqartitsinerimi, tassanilu akuersissutini.

Naalakkersuisut akissuteqarnermini oqaluttuarpoq, inatsit allanngortinniarlugu suliaq aallartinneqareersimasoq. Demokraatinit suliamut tassunga peqataanissarput qilanaaraarput, qulakkeerneqarniassammat, inatsisit malittarisassallu nutarsarnissaat eqaallisarnissaallu, takornariartitsisunut iluaqutaasumik.



DEMOKRAATIT
DEMOKRATERNE

Tassalu Demokraatit oqallinnermut isummersuutigigallagaat.